

ሆሴኤ ቲንቢቲ ጊዶ ቆፋ

ናቤ ሆሴኤይ ከርሰቶሲ ዩሌታናፔ ካሴ 721 ላይላን ሳማሪያ ካታማያ ላሌታናፔ ካሴ ዲዛ ናቤ። ሄ ዎዴ ሜቶይ ኩሚዳ ኢታ ዎዴዛን ናቤ አሞጾፔ ጉዬ ፑዴሃ ባጋራ ዲዛ ኢሰራኤሌ ካዎቲላ ጋርሳን ቲንቢቲ ዳራስ ዮቲዳስ። ሆሴኤይ ዳሬዚ ኤቃ ጸስ ጎይኒዛይሳኔ ጎዳን አማኔቲላ ፓጪሲዳይሳ ቆንጪሲ ዮቲዳስ። ሆሴኤይ ሄሳ ዳሬዚ ጎዳን አማኔቶንታይሳ አሳ ኤሪሳናስ አማኔቶንታ ማቾ ኤኪዲ ኢስታስ ለሚሶ ጊዲዲ ኢስታ ታማርሴስ፤ ኢዛ ማቼያ ጎሜራ ኢዛስ አማኔቶንታይሳዳካ ዳሬዚ ጎዳ ባ ጸሳ አጋጊዳስ፤ ሄሳ ጋሶን ፒርዳይ ኢሰራኤሌ ቦላ ያና ጌስ፤ ጊዶ አቲን ወርሴላን ጎዳይ ባ ዳሬዛ ኬሂ ሲቂዛ ጊሻስ ባኮ ዛሪዲ ባሲኔ ዳራስ ጊዶን ዲዛ ኢሲፊቲላ ኦራጺሲዳስ፤ ሄ ጊታ ሲቆዚ ሃይሳፊ ካሊ ዲዛ ቃላን ቆንጪዳስ፤ «ኢሰራኤሌ አሳዉ! ታ ኔና ዎስታ አጋጎ? ታ ኔና ዎስታ ሃራስ አላ ኢሞ? ታ ኔና ሲቂዛ ሲቆይ ኬሂ ጊታ ጊዲዳ ጊሻስ ሄሳ ኡባ አላናስ ታ ዎዚናይ ኮዬና።» [11:8]

ሃ ማጸፋይ ኦይኪዲ ኩሜላ ቆፋ

ሆሴኤ ሶ አሳይ አማኖይ ባይንዳይታስ ለሚሶ ጊዳስ 1:1
—3:5

ጎዳይ ኢሰራኤሌ፥ ዩሁዳኔ ኢስታ ካሌሊዛይታ ዋላሴ 4:1
—5:15

ዳሬዚ ጎዳኮ ሲሚዳ ሚሳቲሶ 6:1—7:10

ጎዳን አማኔቶንታ ኢጺዳ ኢሰራኤሌ ዳራ 7:11—8:14

ኢሰራኤሌ ዳሬዚ ባስ ቤሲዛ ቂጻቲ ኤኮ 9:1-16

ኢሰራኤሌ ዳራስ ዮቲዳ ሚኖ ቆፊሶ 10:1-15

ጎዳይ ዳራ ሲቂዛ ሲቆ 11:1-11

ጎዳይ ዳራ ቦላ ዬዲዳ ፒርዳ 11:12—13:16

ናጋራፔ ማሬቲሊኔ አንጆ ሂዶታ 14:1-9

¹ ኦዚያይ፥ ኢዮአታሜይ፥ አካዜይኔ ሂዝቂያሲ ኢሶይ ኢሳፊ ካሊ ካሊዲ ዩሁዳን ካዎቲዳ ዎዴ ሄሳዳካ ኢዮአሳ ና

ኢዮርባኣሜይ ኢስራኤልን ካዎቲዳ ዋዴ ቢኤሬ ና ሆሴኤኮ ዪዳ ጎዳ ቃላይ ሃይሳፌ ካሊዛይሳ።

ሆሴኤ ማቸኔ ኢዛ ናይታ

² ጎዳይ ሆሴኤ ባጋራ ኢስራኤል ናይታስ ቃላ ቡሮ ዮቲሹ ሆሴኤስ፡ «ታ ዴሬይ ታፔ ሻኬቲዲ ኢታ ላይማ ላይማቲዛ ጊሻስ ኔኒ ባዳ ኢሲ ላይማቲዛ ማጫስ ኔስ ማቸ ኤካ፤ ኢዚፔ ኔስ ናይታ ዬሳ» ጊዴስ።

³ ሄሳ ጊሻስ ሆሴኤይ ቢዲ ዲቢላዬሜ ናዮ ጎሜሮ ማቸ ኤኪዴስ፤ ኢዛካ ቃንሳታዳ ኢዛስ ኣቲማ ና ዬላዲስ።

⁴ ሄሳፌ ጉዬ ጎዳይ ሆሴኤስ፡ «ኢዩኔ ኢዛ ዜሬላቲ ኢዝራኤልን ዋዲዳ ኣሳታ ጌዶን ኢዩ ዜሬላታ ታ ቃዳያና ዋዴይ ሃሆ ጊዴና፤ ኢስራኤል ካዎቲሉ ሃይሳፌ ጉዬ ኩንዳና ማላ ታ ኦላና።

⁵ ሄ ዋዴ ኢዝራኤል ሾባን ኢስራኤል ኦላ ኣሳ ኡባ ታ ሜንሐሬላና፤ ሄሳ ጊሻስ ኔ ናዛ ሱንላ፡ «ኢዝራኤል» ጋዳ ሱንላ» ጊዴስ።

⁶ ጎሜራ ቃሴካ ቃንሳታዳ ማጫ ና ዬላዲስ። ጎዳይካ ሆሴኤስ፡ «ታኒ ሃይሳፌ ጉዬ ኢስራኤል ኣሳስ ቃዴቲኬ፤ ታ ኢስታ ማሪኬ፤ ሄሳ ጊሻስ ኔኒ ኢዚ ሱንላ፡ «ሎሩሃማ» ጋ ሱንላ።*

⁷ ዩሁዳ ኣሳስ ጊዲኮ ታኒ ታ ሲቆ ቤሳና። ታኒ ጎዳይ ኢስታ ጸሳይ ኣሻና፤ ታ ኢስታ ኣሻናይሲ ኦላ ዋልቃን ጊዴና፤ ማሻን፡ ቶራን ዋይኮ ፓራኒኔ ፓራን ኦሊዛይታን ጊዴና» ጊዴስ።

⁸ ጎሜራ ባ ናዮ ቋንሒ ዲሒዳፔ ጉዬ ቃሴካ ቃንሳታዳ ኣቲማ ና ዬላዲስ።

⁹ ጎዳይካ ሆሴኤ፡ «ሃይሳፌ ጉዬ ኢስራኤል ኣሳይ ታ ዴሬ ጊዴና፤ ታኒካ ኢስታ ጸስ ጊዲኬ። ሄሳ ጊሻስ ኔኒ ኔ ናዛ ሱንላ፡ «ሎኣሚ» ጋ ዴይጋ» ጊዴስ። †

ኢስራኤል ኣሳስ ኢሜቲዳ ሂዶታ

¹⁰ ጊዲኮካ ኢስራኤል ኣሳይ ቆዳይ ባይንዳ ኣባን ሻሚንታ ማላ ዳራና። ሃኢ ጸሲ፡ «ኢንቲ ታ ዴሬ ዴኬታ» ጌቲቲዳሶሆን፡ «ኢንቲ ዴኦ ጸሳ ናይታ» ጌቲቲ ዴይጌታና ዋዴይ ያና።

¹¹ ሄ ዋዴ ዩሁዳ ኣሳይኔ ኢስራኤል ኣሳይ ሲሚዲ ኢሲና ጊዴና። ናምኣቲ ባንታና ኣይሳናዴ ኢሲ ኣስ ዶራና። ቃሴካ ኢስቲ

1:1 2ካዎ 14:23—15:7፤ 15:32—16:20፤ 18:1—20:21፤ 2ታሪ 26:1—27:8፤ 28:1—32:33 1:4 2ካዎ 10:11 * 1:6 ሎሩሃማ ጉሲ ታ ዴራ ታ ማሪኬ ጉሳ። † 1:9 ሎኣሚ ጉሲ ታ ዴሬ ጊዴና። 1:10 ኦሮ 9:26

ባንታ ዳሬን ዲቻኒኔ ዱሬቴላን ዳኣና። ኢዘራኤሌ ጋላሳይ ጌታ ጌዳና።

2

¹ ሄሳ ጊሻሰ ኢንቴ ኢንቴ ኢሻታ ኢሰራኤሌ ናይታ፡ «አሚ»* ኢንቴ ሚቹታካ «ኡሩሃማ» ጌ ሱንሊቴ።

አማኔቶንታ ኢጲዳ ኢሰራኤሌ ኣሳ ቃጸዬቴሉ

² «ታ ናይቶ! ኢንቴ ኣዮ ዘሪቴ፤
ሃይሳፌ ጉዬ ኢዛ ታሰ
ማቾ ጌዱኩ፤
ታኒካ ኢዚሰ ኣዚና ጌዱኬ፤
ባ ሲንሳፌ ላይማ ሱኬ ሃኖ፤
ባ ዋዲራ ጌዶፌ
ላይማቴሉ ዳጉ።

³ ኢዛ ሲሞንታ ኢጲኮ
ኢዛ ባ ኣዬይ ኡሎፔ
ካሎ ዬሌቲዳ ማላ
ታ ኢዘ ጲሬ ካሎ ኣሻና።
ባዘ ማላኔ ማላ ቢታ ማላ
ታ ኢዘ ኦላና።
ታ ኢዘ ሃላ
ሳሞን ዋዳና።

⁴ ላይማ ማጫሳፌ
ዬሌቲዳ ጊሻሰ
ኢዚ ናይታሰ ታ ሚሼቲኬ።

⁵ ኢሰታ ኣያ ላይማ፤
ካዉሻ ሃኖን ሻራዱሰ።
ኢዛ ባ ደናራ፤
ኛቲ ታ ላጌሶታኮ ባይሰ፤
ኢሰቲ ታሰ ካላኔ ሃሌ፤
ሱፌፔኔ ሌኤ ሃሬፔ
ዳዴቲዳ ማይኦ፤
ዋጋራ ዛይቴኔ
ዋይኔ ኡሹ ኢማና፣ ጋዱሰ።

⁶ ሄሳ ጊሻሰ ታኒ ኢዚ ኦጌ
ኣጉንላራ ጎርዳና፤

* 2:1 ኣሚ ጉሲ ታ ዳሬ ጉሳ።

ኢዛ ኬዛና ፔንጌ
ዴሞንታ ማላ
ታኒ ጊሞቤ ዩሻ
ኣላ ጎርዳና።

- 7 ኢዛ ባ ላጌሶታ
ዴማናስ ዋጸና ሺን
ኢስታኮ ጋካናስ ዳንዳዩኩ።
ኢዛ ኢስታ
ዳሮ ኮያና ሺን ዴሙኩ፤
ሃይሳፌ ጉዬ፥
ሃይሳ ሃ ዴሳፌ
ታስ ካሴ ዴሳይ ሎኦ፤
ሄሳ ጊሻስ ቤኒ ታ ኣዚናኮ
ታ ሲማ ባና ጋና።

- 8 ታኒ ኢዚስ ካሴ ካሐ፥
ዋይኔ ኡሺኔ
ዋጋራ ዛይቲ ኢሚዳይሳኔ
ቃሴካ ኢዛ ባኣሌ ጌቲቲዛ
ኤቃ ጸሳስ ያርሾ ቢራኔ
ዋርቃ ኢዚስ ዳርሲዳይ
ታና ጊዲዳይሳ
ኢዛ ሻካ ኤራቤኩ።

- 9 ሄሳ ጊሻስ
ካሉ ካጺዛ ዋዴ
ሃ ካጺዛ ካላ፥
ዋይኔ ኣይፌይ ቲሪዛ ዋዴ
ዋይኔ ኡሻ፥
ታኒ ኢዚፔ ዋላ ኤካና።
ሄሳሐካ ኢዛ ባ ካሎቴላ
ካሞንታ ማላ ሱፌፔኔ
ሌኤ ሃሬፔ
ዳዴቲዳ ማይኦዛ
ታ ኢዚፔ ቃራ ኤካና።

- 10 ኢዚ ላጌሶታ ሲንሳን
ታ ኢዞ ካሎ ኣሻና፤
ኢዞ ታ ኩሺፔ
ኣሻናይ ዴና።

- 11 ኢዛ ባ ኡፋይሳ ባኣሌታ ኡባ፥

ላይላን ላይላን
 ቦንቺዛ ባኣሌታ፥
 ኣገና ጾሮን ጾሮን
 ቦንቺዛ ባኣሌታ፥
 ሳምባታታኔ ሃራ ኢዛ
 ዲማ ዲማ ዶራ
 ቦንቺዛ ባኣሌታ
 ናምኣንሶ ኦሶንታ ማላ
 ታ ዲጋና።

- 12 ኢዛ ባ ላጌሶታፔ
 ባሰ ዋጋ ጋዳ
 ኤኪዳ ዎይኔ ሚላታኔ
 ባላሴ ሚላታ ታ ቶቃላና።
 ኢሰታካ ዎራ ዶኣቲ ማና።

- 13 ባኣሌ ጌቲቲዛ ኤቃ ጸሳሰ
 ኤጸኔ ጨዋሳናሲኔ
 ሎኦ ጌጾ ዋላዳ
 ኢዛ ባ ላጌሶታ ካላዳ
 ታና ኣጊዳ ጊሻሰ
 ታ ኢዞ ቃጸያና።

ጸሲ ባ ዴራ ሲቂዛ ሲቆ

- 14 «ሃሳ ጊሻሰ ታ ኢዞ
 ማቃዳ ባዞ ኤፋና፤
 ሄን ታ ኢዚራ ሲቆ ቃላን
 ሃሳይሳና።

15 ካሴ ኢዚ ዎይኔ ኣታኪልቲዛ
 ታ ኢዚሰ ዛራና፤
 ሜቶ ሾባ ታ ኢዚሰ
 ሂዶታ ፔንጌ ሂሰታና፤
 ሄን ኢዛ ጊብጾፔ ኬዚዳ ጋላሰ
 ናቲላን ዳሼ ዬዲዳ ማላ
 ዬጸና።

- 16 ኢዛ ሄ ጋላሲ ታና፥
 (ታ ኣዚናዞ) ጋ ዴይጋና ኣቲን
 ሃይሳፌ ጉዬ፥
 (ባኣሌ) ጌቲቲዛ

- ኤቃ ጸሳ ሱንላን
ታና ጸይጉኩ።
- 17 ባኣሌ ጌቴቲዛ
ኤቃ ጸሳታ ሱንላ
ታ ኢዚ ዶናፔ ዲጋና፤
ሃይሳፌ ጉዬ
ኢስታ ሱንላ ዴንዴና።
- 18 ሄ ዎዴ ዶኣታራ፥
ካፎታራኔ ቢታ ቦላ
ጎሼቲዛ ሜዴቴል ኡባታራ
ታ ኢንቴ ጊሻስ ጫቄታና።
ኡባይካ ሳሮን ዳና ማላ
ኦላ፥ ቶራኔ፥ ማሻ
ቢታ ቦላፌ ታ ዲጋና።
- 19 ሃኔ ኢስራኤሌ!
ታ ኔና ሜርናስ ታስ ጊጊሳና፤
ታ ኔስ ጸሎቴላኒኔ
ሱራቴላን ፒርዳና፤
ኣጎንታ ሲቆኒኔ ቃዴታን
ታ ኔና ታስ ኦይቻ ጊጊሳና።
- 20 ታኒ ኣማኔታዳ ኔና
ታስ ማኾ ጊጊሳና።
ኔኒካ ታኒ
ጎዳ ጊዲዳይሳ ኤራና።
- 21 «ሄ ጋላስ ታኒ ዛሮ ኢማና፤
ታኒ ሳሎ ኣዛዛና፤
ሳሎይካ ሳኣስ ዛሮ ኢማና።
- 22 ቢታይ ካል፥ ዎይኔ ኡሹኔ
ዛይቴ ኢማና፤
ኢስቲካ ኢዘራኤሌስ ዛሮ ጊዳና።
- 23 ታኒ ታ ዴሬዮ ቢታ ቦላ ቶካና።
(ማሮቴሊ ባይንዳሮ) ጌቴቲዳሮ
ታ ዛራዳ ማራና፤
(ታ ማሪኬ) ጊዳይሳካ
ዛራ ማራና፤
(ኢንቴ ታ ዴሬ ዴኬታ)
ጌቴቲዳታ።
(ታ ዴሬታ) ጋዳ

ታ ጸይጋና ጋና፤
ኢስቲካ ታና፤
‘ኔኒ ኑ ጸሳ’ ጋና» ጌሰ።

3

ሆሴኤ ባ ማቼይራ ማቃይኒዴስ

¹ ጎዳይ ታና፡ «ኢስራኤል አሳይ ሃራ ጸሳታኮ ሲሚዲ ዛቢቤ ኡኬል ሺሻና ኮዪዴስ፤ ሄሳራካ ጎዳይ ኢስታ ሲቁዛይሳ ማላ ኔካ ባዳ ባ ላጌልታ ሲቃዳ ላይማታሼ ዲዛ ካሴ ኔ ማቼዮ ዛራዳ ሲቃ» ጌዴሰ።

² ሄሳ ጊሻስ ታ ኢዞ ታማኔ ኢቻሹ ሳቂሌ ቢራኒኔ 150 ኪሎ ባንጋን ሻማዲሰ።

³ ታ ኢዞ፡ «ኔ ላይማቲዛይሳኔ ሃራ አስ ካሊዛይሳ አጋዳ ታናራ ዳሮ ዋዴ ጸሊሎቴላን ዴኣ፤ ታኒካ ኔናራ አማኔቴላን ዳና» ጋ ዘራዲሰ።

⁴ ሄሳሶካ ኢስራኤል አሳይ ካዋይ ባይንዳ ዋይኮ ካሌሊዛዴይ ባይንዳ፡ ያርሾይ ባይንዳ ዋይኮ ኤቃ ጸሳታ ሃወልቲይ ባይንዳ፡ ቄሴቴላ ማይኦይ ባይንዳ ዋይኮ ኤቃ ጸሳታ ሚሰለይ ባይንዳ ዳሮ ዋዴ ዴኣና።

⁵ ሄሳፌ ጉዬ ኢስራኤል ዴሬይ ጎዳ ባ ጸሳኮኔ ባ ካዋ ዳዊቲኮ ሲማና። ዉርሴላ ዋዴ ኢስቲ ያሻን ኮኮሪሼ ጎዳኮኔ ኢዛ አንጀኮ ያና።

4

ኢስራኤል ቦላ ዴንዲዳ ሞቶ

¹ ሃኖ ቢታይ ቦላ ዲዛ አሳ ኡባ ቦላ

ጎዳይ ሺሺዛ ሞቶይ ዴሰ።

ሄሳ ጊሻስ ኢስራኤል አሳዉ!

ኢዚ ኢንቴና ጊዛይሳ ሲዪቴ፤

«ሃኖ ቢታይ ቦላፌ

አማኔቴላይ፤

ሲቆይኔ ጸሰ ኤርይ ዳይዴሰ።

² ሃን ዲዛይ ቃንጌል፡ ዋርዶ፡

ሼምፖ ዋዶ፡ ላይማቴሊኔ

ጫቂዳ ቃላ ሙሲ ጸላ ዴሰ።

ጌኔይኔ ሾሞፖ ዋጶይ
ዳሪ ዳሪ ቤስ።

- 3 ሄሳ ጋሶን ቢታይ ቦላ
ኮሻይ ዬስ፤
ኢዚ ቦላ ዲዛይ ዉሪ ገልቄስ፤
ሜሄቲ፥ ዶኣቲ፥ ካፎቲኔ
ኣባ ገዶን ዲዛ ሞሉቲ
ኡባይ ዉሬቲስ።»

ጎዳይ ቄሴታ ቦላ ሃንቄቲዴስ

- 4 ጎዳይ፥ «ኢንቴኖ ቄሴቶ
ታ ኢንቴና ሞቲዛ ሚሺ ዴስ፤
ሄሳ ገሻስ ኦኒካ
ሃራ ኣሳራ ፓላሜቶፎ፤
ቃሴ ኦኒካ ሃራ ኣስ ሞቶፖ።
- 5 ኢንቴ ኦማርሲኔ ጋላስ
ጶጶቲታ፤
ናቤቲካ ኢንቴናራ
ጶጶቲቲስ።
ሄሳ ገሻስ ታኒ ኢንቴ ኣዮ
ኢስራኤሌ ጳይሳና።
- 6 ታ ዴሬዛስ ኤራቴሊ
ፓጪዳ ገሻስ ጳይዴስ።
ኢንቴ ታና ኤራናስ
ኮዮንታ ገሻስ
ታኒካ ኢንቴ ታስ ቄሴታ ገዲ
ኦፋና ማላ ኮይኬ።
ኢንቴ ታ ዋጋ ባሉቲዳ ገሻስ
ታኒካ ኢንቴ ናይታ ባላና።
- 7 ቄሴታ ቆዳይ ዳሪ ዳሪ ቢሺን
ኢስቲ ታ ቦላ ኦሊዳ ናጋራይ
ዳሪ ዳሪ ቢዴስ፤
ባንታ ቦንቾካ
ካዉሻን ለሚዳ።
- 8 ታ ዴሬዛ ናጋራይ
ኢስታስ ሙሳስ ኪዱዴስ፤
ሄሳ ገሻስ ዴሬይ
ናጋራ ኦሊዛይሳ

ከሂ ደሲዳ።

- 9 እንቲ ቄሴቲካ ዳራፔ
ዲማቴኬታ፤
ሄሳ ጊሻስ ታ ኡባካ
ኢዛዴ ሃኖ ማላ ኢዛ ቃጸያና፤
ኢዛ ኦሶ ማላካ ኢዛስ ኢማና።

- 10 ታ ዳሬይ ታና ጎዳ
ኦጊዳ ጊሻስ
ኢስቲ ማናሺን
ካሌቴና፤
ላይማታናሺን
ጮራቴቴና» ጌሰ።

ጎዳይ ኤቃ ጸሳታስ ጎይኖ ኢጼስ

- 11 «ላይማቴላስ፥
ጫሊዳ ዋይኔ ኡሻስ፥
ማልኦ ዋይኔ ኡሻ ሱኬስ
ባንታና ኣሊ ኢሚዳ፤
ሄሳንቲ ታ ዳሬዛ
ዋዚና ኤኪዳ።
12 ሄሳ ጊሻስ ሚላፌ ኦሴቲዳ
ኤቃ ጸሳ ዞሬ ኦይቴቴስ፤
ኢስቲ ኢዛን ማርሊዛ ጉፌዚካ
ኢስታስ ዛሮ ኢሚዛ ሚሳቴስ፤
ላይማቴላ ቆፋይ ባሌሊዳስ፤
ባንታ ጸሳስ

ኣማኔቲቤቴና።

- 13 ዙማይ ዲዛሶን ዲዛሶን
ያርሾ ያርሼቴስ፤
ዙምቡላታ ቦላ፥
ጌታ ዳሻ ሚላታ
ኩዋ ጋርሳን
ጸጌቲዛ ያርሾ ያርሼቴስ።
ሄሳ ጋሶን እንቲ ማጫ ናይቲ
ላይማን ዳና፤

እንቲ ናይታ ማቼቲ ላይማታና።

- 14 እንቲ ማጫ ናይቲኔ

አንቴ ናይታ ማቼቲ
 ላይማቲሺን ታኒ ኢስታ ቃጸይኬ፤
 ጋሶይካ አንቴ ኣቱማሳቲ
 ላይማ ማጫሳታራ ሱኬቴቲስ፤
 ኤቃ ጸሳታስ ላይማቴላ
 ያርሾ ሺሺዛይታራ
 አንቴካ ኢዛሶ ያርሼታ።
 ሄሳ ጊሻስ ኣኬካይ ባይንዳ
 ዴሬይ ቋያና።

- 15 «አንቴኖ ኢስራኤል ኣሳቶ!
 አንቴ ላይማቲኮካ
 ዩሁዳ ኣሳይ
 ላይማታና ማላ ኦሶፍቲ፤
 ሄሳ ጊሻስ ታስ ጎይናናስ
 ጌልጌላ ዎይኮ
 ቤቲ-ኣዌኔ ጌቲቲዛሶ ቦፒቲ፤ *
 «ዴኦ ጎዳይ ቤዪን» ጊዲ
 ታ ሱንላን ጫቆፍቲ።

- 16 ኢስራኤል ዴሬይ ማካላንቻ
 ኡሳ ማላ ማካሊዴስ፤
 ሂስቲን ጎዳይ ኢስታ
 ደርሳ ላቃታ ማላ
 ሎኦሶን ዎስቲ ሄማኔ?

- 17 ኤፍሬሜይ ኤቃ ጸሳታ ጎይኖን
 ኦይኬቲዳ ጊሻስ
 ኢስታ ጌዴ ኣጋጊቲ።

- 18 ዎይኔ ኡሹ ኡዪዳፔ ጉዬ
 ላይማቴቲስ።
 ኢስታ ኣይሲዛይቲካ

 ዩላቺዛ ሚሽ ዶሴቲስ።

- 19 ኢስታ ጎቲ ጫርኮይ ፒቲ ኤፋና፤
 ኢስታ ያርሾይ ኢስታ ቦላ
 ዩላ ኤሃና።

* 4:15 ቤት-ኣዌኔ፡ ቤት-ኣዌኔ ጉሲ ኢታቴላ ኬል ጊዲሺን ቤትኤሌስ ኢሜቲዳ ጫቻ ሱንላ።

5

- 1 ኢንቴኖ ቁሴቶ ሃይሳ ሲዩቴ!
 ኢሰራኤል አሳቶ አኬኪቴ!
 ካዎ ኬላ አሳቶ
 ሃይሳ ኤዘጊቴ!
 ሄኮ ፒርዳይ ኢንቴ ቦላ ዩዴስ፤
 ጋሶይካ
 ኢንቴ ሚጸጸን ናርጸ፤
 ታቦሬ ዙማን ጊቴ ጊዲዴታ።
- 2 ማካላንቻቲ ሼሞፖ ዎጶ
 ካሴፔ ሃ ዳርሲዳ፤
 ሄሳ ጊሻስ ታኒ ኢስታ
 ኡባካ ቃጸያና።
- 3 ታኒ ኢሰራኤል አሳ ኡባ ኤራይስ።
 ኢሰራኤሉይ ታ አይፌፔ
 ጌማቤኩ፤
 ኤፍሬሜ፥ ኔኒ ላይማቴላ
 ጎይኖን ቱናዳሳ። *
- 4 ኢሰራኤል አሳይ ኦሲዳ ሞርይ
 ኢስቲ ባ ጸሳኮ
 ሲሞንታ ማላ ዲጊዴስ።
 ላይማቴላ አያናይ
 ኢስታ ዎዚና ኩሚዴስ።
 ሄሳ ጊሻስ
 ኢስቲ ጎዳ ኤሬቴና።
- 5 ኢሰራኤል አሳ ኦቶርይ
 ኢስታ ቦላ ሲሚ ማርካቴስ።
 ኢስቲ ባንታ ናጋራን ጶጶታና።
 ዩሁዳይካ ኢስታራ ኢሲፌ
 ጶጶቲ ኩንዳና።
- 6 ኢስቲ ጎዳ ኮያናስ
 ባንታ ዉዴ ሜሄታኔ
 ሚዛታካ ላጊ ኤፋና፤
 ጊዶ አቲን ኢዚ ኢስታፌ
 ሻኬቲዳ ጊሻስ
 ኢስቲ ኢዛ ዴሜቴና።

* 5:3 ኤፍሬሜ፡ ኤፍሬሚ ጌቴቲዛይሲ ኢሰራኤሉስ ናሞኣንሉ ሱንላ።

7 ኢስቲ ኤቃ ጸሳታሰ
 ጎይኒዛ ጊሻሰ
 ጎዳሰ አማኔቲቤቴና፤
 ኢስቲ ላይማን ናይታ ዬሊዳ።
 ሄሳ ጊሻሰ ኢስቲ አገና ጾሮን
 ቦንቹዛ ባኣሌይ
 ኢስታኔ ኢስታ ናይታ
 ኢሲፌ ዳይሳና።

ኢስራኤሌኒኔ ዩሁዳ ጊዶን ዴንዳና ኦላ

8 አሳይ ኦላሰ ኬዛና ማላ
 ጊቢኣን ዛዬ ዛዬቴ፤
 ኤራማን ጸሩሞባ ፑኒቴ።
 ቤቲ-አዌኔን፤
 ሳቢያሜ ባጋቶ!
 ኦ ኢንቴናራ ዶሰ) ጊሼ ዋሲቴ።

9 ቁጻቴይ ዪዛ ዋዴ
 ኤፍሬሜይ ቡላ ጊዳና፤
 ሃይሲ ኢስራኤሌ ቦላ
 ጋካናይሳ
 ታ ሎኤላ ኤሪሳይሰ» ጌሰ።

10 ጎዳይ፥ «ዩሁዳ
 ካሌሊዛይቲ ዳሰ
 ሾዲዛ አሳ ማላ
 ጊዲዳ ጊሻሰ
 ታኒ ታ ሃንቆ ሃላ ዲኦ ማላ
 ኢስታ ቦላ ዬዳና።

11 ኢስራኤሌ አሳይ ሃዳ ጸሰ
 ካሎን ሚኒዴሰ።
 ሄሳ ጋሶን ናቁቲዴታኔ
 ፒርዳን ቆሂቲዴታ።

12 ሄሳ ጊሻሰ ታኒ
 ኢስራኤሌ አሳ ፒኖ ማላ፥
 ዩሁዳ አሳሰ ቃሴ
 ቁኖ ማላ ጊዳና።

13 ኢስራኤሌይ ባ ሳኮዛ፤
 ዩሁዳይካ ባ ማዲንላ ቤኢዲ
 ኢስራኤሌይ አሶሬኮ

- ባ አይፍሶ ዛራዲስ፤
 ኢስራኤሌይ ማዶ ዳማናስ
 ጌታ አሶሬ ካዎኮ
 ቃስታኔ ኪታዱስ።
 ጌዶ አቲን ኢዚ አንቴና አሻናስ
 ዎይኮ አንቴ ማዲንፋ
 ፓላናስ ዳንዳይቤና።
 14 ሄሳፌ ዳንዲዳይሳን
 ታኒ ኢስራኤሌስ ጋሞ ማላ
 ዩሁዳስካ ዎዳላ
 ጋሞ ማላ ጌዳና፤
 ታ ኢስታ ኒፊፊ ሂስታ
 ሜንፌሬፋ ዩጋና፤
 ቦንቃ ኤካዳ ባና፤
 ኮኒካ ኢስታ ታ ኩሼፔ
 አሻናስ ዳንዳይና።
 15 ኢስቲ ባ ባላ ኤሪዲ ታኮ ሲማና ጋካናስ
 ታኒ ኢስታፌ ሃካና።
 ኢስታ ቦላ ሜቶይ ዳሪዛ ዎዳ
 ኢስቲ ታና ሚንፌ ኮያና» ጌስ።

6

ዎዚናፔ ጌደንታ ማሮቴል

- 1 ዳሬዚ፥ «ሃ ዪቴ፥
 እኔ ጎዳኮ ሲሞስ!
 ኢዚ ኑና ሜንፌዳ ማላ
 ኢዚካ ኑና ዛሪዲ ኮላና፤
 ኢዚ ኑና ማዲንፌዳ ማላ
 ዛሪዲካ ኢዚ ኑ ማዲንፋ
 ፓላና።
 2 ናሞኤ ጋላሳታፔ ጉዬ
 ኢዚ ኑና ቤጎላና፤
 ሄሻንፊ ጋላስ
 ኢዚ ኑና ዳንፋና፤
 ኮኒካ ኢዛ ሲንፋን
 ፓጸ ዳና።
 3 እኔ ኮኒ ጎዳ ኤሮስ!
 ኑ ኢዛ ሎኤፌ ኤራናስ

- እኔ ሚኔቶስ!
 ኢዚ ዋንታ ፖኦ ማላ
 ኑስ ቆንጫና፤
 ቢታ ካልሲዛ አሱራ ኢራ ማላኔ
 ባልጎ ኢራ ማላ
 ኢዚ ኑኮ ያና» ጌስ።
- 4 ጎዳይ፥ «ኤፍሬሜ አሳቶ!
 ዩሁዳ አሳቶ!
 ታ አንቴና ዋስቲኮ ሎኦ?
 አንቴ ታና ሲቂዛ ሲቆይ
 ማላዶ ሻራ ማላኔ
 ማላዶ ጸዛ ማላ
 ጮ ቲሞኢ ጊ ኤሶን ዳዬስ።
- 5 ሄሳ ጊሻስ
 ታኒ ታ ናቤታ ባጋራ
 አንቴና ቃንጾሬላዲስ፤
 ታ ዶናፔ ከኢዛ ቃላን
 ታ አንቴና ዋዳዲስ።
 ታ ፒርዳይካ አንቴ ቦላ
 ዋልቃንፋ ማላ ፖኢዴስ።
- 6 ታኒ ያርሾፌ አላዳ ማሮቴል ዶሳይስ።
 ጹጌቲዛ ያርሾፌ አላዳ
 ጸስ ኤሮ ዶሳይስ።
- 7 ኢስቲ ቃሴ ካሴ አዳሜ
 ጌቴቲዛሶን
 ታናራ ጌሊዳ
 ጫቆ ቃላ ላሊዳ፤
 ሄንካ ኢስቲ ታናን
 አማኔቲቤቴና።
- 8 ጋላኣዳይ ሱላን ሞሬታዲስ፤
 ኢታ አሳታ ዱሳሶ ጊዳዲስ።
- 9 ፓንጋቲ አሴ ዋዳናስ
 ዛማዲዛ ማላ
 ቄሴቲካ ዙፔቲዲ ሄሳዎ ኦፊቴስ።
 ጌዴ ሴኬሜ ኤፊዛ ኦጌ ቦላካ
 ናጊ ናጊ አስ ዋዴቴስ፤
 ዩላቺዛ ኢታ ሚሽ

ኦሴቴስ።*
 10 ዲዢጊንሉዛ ኢታ ሚሽ
 ኢስራኤልን ቤያዲሰ፤
 ኤፍሬሜይ ኤቃስ ጎይኖኒኔ
 ላይማቴላን ቱኒዴስ።

11 «ኢንቴኖ ዩሁዳ አሳቶ!
 ታ ኢንቴኖ ቃጸያና ጋላስ
 ባራ ዋላዲስ።

7

1 «ታኒ ታ ዴሬ ኢስራኤል
 አሳ ፓላናሲኔ
 ዛራዳ ዱሬሳናስ ኮይዛ ዋዴ፤
 ኤፍሬሜ ናጋራይኔ
 ሳማሪያ አሳ ኢታቴሉ
 ከሂ ዳሪ ቤቴዴስ።
 አሰቲ አሶይ አሳስ ዋርዶቴቴስ፤
 ካይሶቲ ከሌ ቦኪ ጌሊዲ
 ካይሶቴቴስ፤
 ፓንጋቲ ኦጌ ቦላ
 አቶሶን አቶሶን
 ቦንቄቴስ።

2 ጌዶ አቲን ታኒ ሃይሳ
 ኢስታ ኢታቴላ ዉርሳ ኤሪዛይሳ
 ኢስቲ አኬኪቤቴና።

ሄሳ ጊሻስ ኢስታ
 ኢስታ ናጋራይ ጌዶሉ
 ዋሊዴስ፤
 ኢስታ ኢታ ኦሶይ
 ታፔ ጌሚቤና» ጌስ።

ካዋ ከላን ዴንዲዳ ኢታ ማቆ

3 ጎዳይ፥ «ኢስቲ ካዋዛ ባ ኢታቴላን
 ሃላቃታካ ባንታ ዋርዶን
 ባሌሌቴስ።

4 ኢስቲ ዉሪካ ላይማቴዛይታ፤
 ቡኬሶይ ዴንዳና ጋካናስ

* 6:9 ሴኬሜይ ጸሓኢ ዲዛሶ።

- ዳቦ ኡኪዛዴይ
 ታማ ኤፋናስ
 ኮሾንታ ሴሊሲዳ ጮጮ ማላ።
- 5 ኑ ካዋዛ ባኣሌ ጋላስ
 ሃላቃቲ ዋይኔ ኡሻን
 ማሶ ሌላ ጊዳ።
 ኢዚካ ቂጂዛይታራ ዙፔቲዴስ።
- 6 ኢስታ ዋዚናይ
 ጮጮ
 ታማ ማላ ሴሊዴስ፤
 ጌኔን ኢዛኮ ሽቄቴስ።
 ኢስቲ ኦማርሲ ኩሚላ
 ሃንቆ ጩዋቲሼ ኣቄቴስ
 ዋንቴላ ጋላስ ኤጲዛ ታማ ማላ
 ፖፖልኡ ጌቴስ።
- 7 ወሪካ ታማ ጮጮ ማላ ሴሊዳይታ፤
 ባንታና ኣይሲዛይታ
 ዲፒ ሂስቲ ወርሲዳ።
 ኢስታ ካዋቲካ ኩንዲዳ፤
 ኢስታፌ ኦኒካ
 ታኮ ሽቄቤና።

ኢስራኤል ኣሳይ ሃራ ካዋቲላታራ ዋላኬቲዴስ

- 8 «ኤፍሬሚይ ሃራ ካዋቲላታራ ዋላኬቲዴስ፤
 ኢዚ ሽሬቶንታ ኣቲዳ
 ኡኬላ ማላ።
- 9 ኣላጋቲ ኢስታ ዋልቃ ሚዳ፤
 ጊዶ ኣቲን ኢስቲ ሄሳ
 ኤሪቤቴና።
 ኢዛ ሁኤይ ፑሉንሐ ጫዲዴስ፤
 ጊዶ ኣቲን ኢዚ ሄሳ ኤሪቤና።
- 10 ኢስራኤል ኣሳ ኦቶሬቴላ
 ኢስታ ቦላ ማርካቴስ፤
 ሄሲ ወሪ ሃኒንካ
 ኢስቲ ጎዳ ባንታ ጸሳኮ
 ሲሚቤቴና፤
 ኢዛካ ኮዪቤቴና።

- 11 «ኢስራኤል አሳይ ኤሌ ባሌቲዛኔ
 ቆፋይ ባይንዳ
 ሃራጾ ካፎ ማላ።
 ኢሲቶ ገብጾ ጸይጌሰ፤
 ሃራ ዋዴ
 ቃሴ አሶሬኮ ሲሜሰ፤
- 12 ኢሰቲ ፒራዲሺን ታ ገቲ
 ኢሰታ ቦላ ዩጋና፤
 ሳሎ ካፎታ ማላ
 ዱጌ ጎቻ ዋላና፤
 ኢሰቲ ኦሊዳ ኢታ ኦሶ ገሻሰ
 ታ ኢሰታ ዴሬ ሲንፋን
 ቃጸያና።
- 13 ኢሰቲ ታፔ ሃኪ ቢዳ ገሻሰ
 ኢሰታሰ አዬ አና!
 ታ ቦላ ኢሰቲ ማካሊዳ ገሻሰ
 ኢሰታ ቦላ ጳይሲዛዚ ዮ፤
 ታኒ ኢሰታ ዋዛና ኮያዲሰ፤
 ኢሰቲ ገዲኮ ታ ቦላ
 ዋርዶ ሃሳዬቲሰ።
- 14 ኢሰቲ ባ ሂጸ ቦላ
 ኢቺዱ ዩኬቲሰ፤
 ገዶ አቲን ዋዚናፔ
 ታኮ ዋሴቴና፤
 ካላሲኔ
 ኡሻሰ ሺቄቲሰ፤
 ገዶ አቲን ታፔ ሼርኢ ገዳ።
- 15 ታኒ ኢሰታ ታማርሳዲሲኔ
 ኢሰታ ሚንፋዲሰ፤
 ኢሰቲ ገዲኮ ታ ቦላ ዴንዲዳ።
- 16 ታፔ ሃኪዲ
 ሃዳ ሚሻኮ ሲሚዳ፤
 ኢሰቲ ጫዳና ጸንጊን
 ዋራ ቢዛ ቶራ ማላ።
 ኢሰታ ካሌሊዛይቲካ
 ባንቲ ሃሳይዛ ኢታ
 ቃላ ጋሶን
 ማሻን ዉራና፤

ሄሳፌ ዴንዶይሳን ኢስቲ ጊብጾ
ቢታን ቂጴስ ኣታና።

8

ኢስራኤል ኣሳ ቦላ ዪዳ ጎዳ ሃንቆ

- 1 «ኣሳይ ታናራ ዲዛ
ጫቆ ቃላ ላሊዴስ፤
ታ ዋጋ ቦላካ ማካሊዴስ።
ሄሳ ጋሶን ሞርኬይ
ኣርጋንሳ ማላ
ጎዳ ኬላ ቦላ
ኣላንጼስ።
ሄሳ ጊሻስ
ኢስቲ ናጌታና ማላ
ዛዬ ፑና!
- 2 ኢስቲካ፥ ‹ጸሳዉ!
ኑ ኔና ኤሮስ› ጊሼ
ታኮ ዋሴቲስ።
- 3 ጊዶ ኣቲን ኢስራኤል ኣሳይ
ሎኦ ሚሽ ኢጲዳ ጊሻስ
ሞርኬይ ኢስታ ጎዳና።
- 4 «ታ ሼኔ ጊደንታ ኢስቲ ባስ
ካዎታ ካዎሊዳ፤
ታና ኦይቾንታ ዲሼ
ዳናታ ደሪዳ፤
ባ ቢራፔኔ ባ ዋርቃፌ
ባና ቆይሳና ኤቃ ጸሳታ
ባስ ኦሊዳ።
- 5 ሳማሪያ ዴሪ ኣሳቶ!
ማሪ ሚሳቲሲ ኢንቲ ሜጲዳ
ኤቃ ጸሳቲ ታና ሻቲቲስ።
ታ ሃንቆይ ኢንቲ ቦላ
ታማ ማላ ኤጼስ፤
ኢንቲ ሞሮ ኦሶን
ኣይዴ ጋካናስ ኢንቲ ጋሞኣኔ?
- 6 ሂላንቻይ ማራ ሚሰሌ
ሜጲዳ ኤቃ ጸሳቲ

ጸሰ ጊዳናሰ ዳንዳዬቴና።
 ሄሳ ጊሻሰ
 ማር ሚሳቲ ኦሴቲዳ
 ሳማሪያ ኤቃ ጸሳቲ
 ማቄሬቲ ዋቆና።

7 ኢሰቲ ጫርኮ ዜሪዲ ጎቲ ሺሻና፤
 ቡጸ ቦላ ኣይፌይ ዴና፤
 ጳሌይካ ቤቴና፤
 ኣይፊኮካ ኣላጋቲ ማና።

8 ኢሰራኤሌይ
 ሃራ ካዋቲላታ ጊዶን
 ሂራይሶ ሚሻ ማላ ጊዲዳ።

9 ባርካ ባዙ ቢታን ቶይላቲዛ
 ሃርዲዳ ማላ
 ጌዴ ኣሶሬ ዴሬ ቢዳ።
 ባና ማዳና ማላ
 ካዋታሰ ሚሼ ኢሚዲ
 ባሰ ዳቦ ሻሚዳ።

10 ኢሰቲ ባና ካዋታሰ
 ኣሉ ባይዚኮካ
 ሃኢ ታ ኢሰታ ሺሻና፤
 ካዋቲኔ ዳናቲ
 ኢሰታ ቦላ ጋሊዛ
 ሜቶፔ ዴንዲዳይሳን
 ኢሰቲ ጉጺ ጉጺ ባና።

11 «ኤፍሬሜይ ናጋራ ዉርሳናሰ
 ዳሮ ያርሾሶሆ ኦሊዴሰ፤
 ጊዶ ኣቲን ሄ ያርሾሶሆቲ
 ናጋራ ኦሊዛሶ ጊዲዳ።

12 ታ ኢሰታሰ ታ ዋጋ ጋርሳን ዲዛ
 ዳሮ ሚሻታ ጸፋዲሰ።
 ኢሰቲ ጊዲኮ
 ሃዳ ሚሻ ማላ ቆዲዳ።

13 ኢሰቲ ሎኦ ያርሾ ሺሼቴሰ
 ሄ ያርሾ ኣሾዛካ ሜቴሰ፤
 ጊዶ ኣቲን ጎዳይ
 ኢሰታን ኡፋዬቲቤና።

ሄሳ ጊሻስ ኢዚ ኢስታ
ኢታቴላ ዛሪ ቆፓና፤
ኢስታ ናጋራ ጊሻስ ቃጸያና።
ኢስቲካ ገብጾ ሲማና።

- 14 «ኢስራኤል ዴሬይ
ባስ ገታ ካዎቴላ
ኬላታ ኬዲዴስ፤
ጊዶ ኣቲን ባና ሜዲዲሳ ባሊዴስ።
ዩሁዳ ዴሬይካ ዳሮ ሚሮ
ካታማታ ኦሊዴስ፤
ጊዶ ኣቲን ታኒ ሄ ካታማታ ቦላ
ታማ ዬዳና፤
ኢስታ ሚጸታካ
ታማይ ማና» ጊዴስ።

9

ኢስራኤል ቦላ ያና ቂጸቴ

- 1 ኢስራኤል ኣሳዉ! ኡፋዬቶፍቴ!
ሃራ ካዎቴላታ ማላ
ኡፋይስ ኖጮጮ ጎፒቴ!
ኣይስ ገሶ ኢንቴ ኢንቴ ጸሳስ
ኣማኔቲቤኬታ
ካላ ባሌ ኡባን
ላይማቴላስ
ኢሚዛ ዋጋ ዶሲዴታ።
- 2 ሄሳ ጊሻስ ሃይሳፌ ጉዬ
ኢንቴ ካላ ባሊፔ ካሐ፤
ዎይኔ ጉሞኢዛሶሆፔ
ዎይኔ ኡሹ ዴማኬታ።
ኦራላ ዎይኔ ኡሺካ
ኢንቴስ ፓጮና።
- 3 ኢስራኤል ዴሬይ ጎዳይ
ኢስታስ ኢሚዳ ቢታን ኡቴና።
ኤፍሬማይ ዱጌ ገብጾ ሲማና፤
ኣሶሬካ ቢዲ ቱኒዳ ካሐ ማና።
- 4 ሄን ጎዳስ ዎይኔ ኡሹ
ያርሻናስ ዳንዳዬቴና፤

- ኢስታ ያርሾይካ
 ጎዳ ኡፋይሴና።
 ሄሳ ጊሻሰ ኢስታሰ ያርሾዚ
 ሾቻ ካል ጊዳና፤
 ኢዛ ሚዛ ኡባይ ቱናና።
 ሄ ካላዚ ጮ ጋፋሰ
 ሚዛ ካል ጊዳና ኣቲን
 ጎዳ ኬል ያርሾሰ ሸቆና።
 5 ሂስቲን ኢንቲ ዱማ ዱማ
 ባኣሌ ጋላሳታኒኔ
 ጎዳ ባኣሌ ጋላሳታን
 ኣይ ኦፊቲ?
 6 ኢስቲ ባሻፌ ኣታናሰ ቤቲኮካ
 ጊብጾይ ኢስታ ሸሻና፤
 ሚምፒሳ ጌቲቲዛሶን
 ኢስታ ሞጋና፤
 ኢስቲ ሃሪዳ ቢራይ ወሪካ
 ሻራፋ ማይኢ ኣታና፤
 ኢስታ ዱሳሶ
 ኡባ ኣጉንሒ ላታና።
 7 ቃጸያና ዎዴይ ጋኪዴሰ፤
 ፒርዳ ጋላሲካ ጋኪዴሰ፤
 ሄሳ ኢስራኤል ኣሳይ ኤሮ።
 ኢንቲ ኦሒዳ ናጋሪይ
 ዳሮ ጊዲዳ ጊሻሲኔ
 ኢንቲ ሞርኬቴሉ ጌታ ጊዲዳ
 ጊሻሰ ናቤይ ኤያ ማላ፥
 ጸሳ ኣያናይ ኢዛ ቦላ
 ሼምፒዳይይ
 ጎሻ ማላ ቆዴቲዴሰ።
 8 ናቤይ ጸሳራ ጊዲዲ
 ኤፍሬሜ ናጊዛይ፤
 ጌዶ ኣቲን ኢዛ ኦጌ
 ኡባን ዎጺማይይ፥
 ኢዛ ጸሳ ኬላን ኢጸይ
 ኢዛ ናጌሰ።

- 9 ኢስራኤል አሳይ
 ካሴ ገቢአ ዋዴ ዲዛ
 አሳ ማላ ኬሂ ቱኒዴሰ፤
 ጸሲ ኢስታ ቆሆዛ ቆፒዲ
 ኢስታ ናጋራ ገሻሰ
 ኢስታ ቃጸያና።

ናጋራ ጋሶን ኢስራኤል አሳ ኩንዴል

- 10 ጎዳይ፥ «ታኒ ኢስራኤል አሳ
 ዴሚዳ ዋዴ ታሰ ባዞ ቢታን
 ዋይኔ ሚላ አይፌ
 ዴሚዳ ሚሳቲዴሰ።
 ታኒ ካሴ አንቲ አዋታ
 ቤኢዳ ዋዴ
 ታሰ ኮይሮ ካጸዳ ባላሴ ሚላ
 አይፌ ቤኢዳ ሚሳቲዴሰ።
 ኢስቲ ባኣሊ-ፔኦሬ ጋኪዳ ዋዴ
 ባንታናቴላ ዬላቺዛ
 ኤቃ ጸሳሰ ዲማሲዳ።
 ኢስቲካ ሄ ባ ሲቂዛ
 ኤቃ ጸሳ ማላ ቱኒዳ።
- 11 ኤፍሬሜ ቦንቾይ
 ካፎይ ፒራጂዛ ማላ
 ፒራጂ ጳያና፤
 ሃይሳፌ ጉዬ ና ቃንላቴሊ፥
 ሻራይኔ ና ዬሎይካ ዴና።
- 12 ና ዬሊዲ ዲቺኮካ
 ኢስቲ ጶማና ጋካናስ
 ታ ኢስታ ዋጳና።
 ታ ኢስታፌ ታ አይፌሶ ዛሪዳ ዋዴ
 ኢስታሰ ኣዬ እና!
- 13 ኤፍሬሜይ ጸረሴ ማላ
 ሎኦ ጋዴን ቶኩቲን ቤኣዲሰ፤
 ሃኢ ገዲኮ ኤፍሬሜይ
 ባ ናይታ ሼሞፖ ዋጂዛይታሰ
 ኣሉ ኢማና።
- 14 ጎዳዉ! ኔ ሃ ዴራሰ

አይ አማኔ?
አጩጫዪዛ ኡሎኔ
ሹላ ቋንሐ አማ!

ኢስራኤል አሳ ቦላ ጾሳ ፒርዳ

- 15 «ኢስቲ ጌልጌላን
ኦሒዳ ኢታቴላ
ጋሶን ታ ኢስታ ኢጸዲሰ፤
ኢስቲ ኦሒዳ ኢታ ኦሶ ጊሻሰ
ታ ኬላፌ ታ ኢስታ ጎዳና፤
ሃይሳፌ ጉዬካ
ታ ኢስታ ዶሲኬ፤
ኢስታ ካሌሊዛይቲ
ኡባይ ማካላንቻታ።

- 16 ኤፍሬሜይ ሾጩቲዳሰ፤
ኢስታሰ ጸጶይካ ሚሊዳሰ፤
ኢስቲ አሻሎን ዲቺዳ ናይታ
ታ ዋቋና» ጌሰ።

ሆሴኤይ ኢስራኤል አሳ ሴሪዳሰ

- 17 ኢስቲ አዛዜቶንታ ኢዲዳ ጊሻሰ
ታ ጸሲ ኢስታ ዬጊ አጋና፤
ኢስቲካ ካዋቴላታ ጊዶን
ጮ ቶይላታና።

10

- 1 ኢስራኤል አሳይ ዳዪዳ
ዋይኔ ሚላ ማለ።
ኢስቲ ዳሮ አይፌ አይፊዳ፤
አይፌዚ ዳሪዳ ኬና
ዳሮ ያርሾሶሆ ሜቋዳ።
ኢስታ ቢታያ ሎኦ አይፌ አማዳ
ኢስታ ዱሬሲዳ ማለ
ኢስቲ ጎይኒዛ ቱሳታ አሌቄሲዳ።
2 ኢስታ ዋዚናን ጌይይ ኩሚዳሰ፤
ኢስቲ ባ ኦሒዳ ጌኔዛ
ዋጋ ኤካና።

ጎዳይ ኢስቲ ያርሾ
 ያርሺዛሶሆታ
 ኡባ ላላና።
 ኢስቲ ጎይኒዛ ኤቃ ጸሳ
 ቱሳታካ ሾዳና።

3 ኢስቲካ፥ «ኮስ ካዎይ ዴና፤
 ኑኒ ጎዳ ቦንቾንታ
 ጊሻስ ካዎይ ዲዛኮካ
 ኢዚ ኮስ ኣይ ኦላኔ?» ጋና።

4 ኢስቲ ዋርዶራ ጫቂዲ
 ቃላ ጌሌቴስ፤
 ሃዳ ሂዶታ ኦሌቴስ፤
 ሄሳ ጊሻስ ካላ ጊዶን
 ማርዜራ ዲዛ ሃሩማ ማታይ
 ሞኪዛ ማላ
 ኢስታ ጊዶን ጌኔ ፒርዳይ ዳራና።

5 ሳማሪያ ካታማን ዲዛ ዴሬይ
 ቤት-አዌኔን ዲዛ
 ማራ ሚስሌን ኦሴቲዳ
 ኤቃ ጸሳስ ያዬስ።
 ኢዛፔ ቦንቾይ ቃሬቲ
 ከቺዳ ጊሻስ
 ኣሳይ ዩኬስ።
 ሄ ኤቃ ሚስሌዛ ቄሴቲካ
 ዋሴቴስ።

6 ሄ ኤቃ ሚስሌዚ ጌታ ጊዲዳ
 ኣሶሬ ካዎስ ኪያቴል ኢሜታና።
 ኤፍሬሜይ ካዉያና፤
 ኢስራኤሌይካ ባንታ ኤቃ
 ጸሳ ጊሻስ ዬላታና።

7 ሳማሪያ ካዎይ
 ሃላ ጎፖንቶ ማላ
 ጮ ጳያና።

8 ኢስራኤሌስ ናጋራ ጊዲዳ
 ቤት-አዌኔን ጎይኒዛሶሆ
 ዙሞቡላዚ ጳያና፤
 ኦካይኔ ኦሃይ ሞካና፤
 ሄ ዋዴ ዴሬይ ዙማታ፥

«ኑና ቆቲቲ!»
 ዙምቡላታካ
 «ኑና ካሚቲ!» ጋና።

ጎዳይ ኢሰራኤል አሳ ቃጸያና

9 ጎዳይ፥ «ኢሰራኤል አሳዉ!

ጊቢአን ናጋራ አላሶፔ

ሃች ጋካናስ

ጌባኦን ናጋራ አላዛይታ

አላይ ወርሲቤ?

10 ታኒ ኮይዛ ዋዴ ኢስታ ቃጸያና፤

ኢስቲ አላዳ

ዳኮ ናጋራ ጊሻስ

ቂጻቲይ ኢስታ ቦላ ጋካና፤

ካዋቲላቲ

ኢስታ ቦላ ዴንዳና።

11 ኢሰራኤልይ ካል ቡካናስ

ዶሲዛ ሜሄ ማላ፤

ጊዶ አቲን ሎኢዛ ኢዚ ሞርጌ ቦላ

ቃምባራ ዋላና፤

ኤፍሬሜ ዋጻና፤

ዩሁዳይ ጎያና፤

ያቆቤ ናይቲ

ዋጾቲዲ ቢታ ፒጻና።

12 ጎዳይ ዪዲ ጸሎቴል

ኢንቲ ቦላ ኢራ ማላ

ቡኪሳና ጋካናስ

ሃና ኢንቲ ኢዛ ኮይዛ ዋዴ

ጊዲዳ ጊሻስ ኦላ ጎዪቲ፤

ኢንቲስ ጸሎቴል ዜሪቴ፤

ሚኖ ሲቆ አይፌ ማጸቲ።

13 «ኢንቲ ጊዲኮ ኢንቲ ዋልቃኒኔ

ኢንቲ ኦላ ቃራታ ዳሮቴላን

አማኔቲዲ ኢታቴላ ዜሪዴታ፤

ናጋራ ሺሺዴታ፤

ዋርዶቴላ አይፌ ሚዴታ።

- 14 ሺሊማኔይ ቤተ-አርቤሌ
 ጌቴቲዛ ካታማ ኦላን ካሴ
 ላሊዳይሳሶኔ
 አዬታ ናይታራ ጋሊ
 ቢታ ቦላ
 ዲንጨፎሬላ ወርሲዳ ማላ
 ሺሮይ ዴራ ቦላ ያና።
 አንቴ ዴራ አሳ ቦላ ዋልቃማ
 ኦላይ ያና፤
 አንቴ ሚጻይ ላሌታና።
- 15 ቤቴሌ! ኔ ኢታቴላ
 ጌታ ጌዲዳ ጌሻስ
 ኔ ቦላካ ሄሳላ ሃናና፤
 ሄ ጋላሳያ ጋኪዛ ዋዴ
 ኢስራኤሌ ካዋይ
 ሙሌራ ቆያና» ጌስ።

11

- ኢስራኤሌስ ጎዳ ሲቆ
- 1 ጎዳይ፥ «ኢስራኤሌይ ቡሮ
 ዪቆን ዲሺን ደሳዲስ።
 ሂስታዳ ታ ናዛ
 ታ ጌብጼ ቢታፌ ጸይጋዲስ።
- 2 ጌዶ አቲን ታ ኢስታ ጸይጌዳ ኬና
 ኢስቲ ታፔ ጌዴ
 ሃኪ ሃኪ ቢዳ።
 ባኣሌስ ያርሾ ሺሺዳ፤
 ኢዛ ሚሰሌታሲካ
 ኤጸኔ ጨዋሲዳ።
- 3 ኤፍሬሚስ ኩሺዛ ኦይካዳ
 ሄሚል ታማርሲዳይ ታና፤
 ጌዶ አቲን ኢስታ ፓላዳይ
 ታና ጌዲዳይሳ
 ኢስቲ ኤሪቤቴና።
- 4 ታ ኢስታ ቃዴታ ዋዶሮኒኔ
 ሲቆ ሳንሳላታን
 ታኮ ሺሻዲስ፤

ኢስታ ሞርጌፌ
ቃሞባራ ዳንፋዲስ፤
ዚቂ ጋ ሆካዳ ኢስታ ሚዛዲስ።

5 «ሂስቲን ኢስቲ
ማርቴላን ጌሎንታ ጊሻስ
ዱጌ ጌብዴ ሲሜቲኔ?
ኣሶሬይ ኢስታ ሃሬኔ?

6 ኢስታ ኢታ ሃልቾ ጊሻስ
ሞርኬ ቶራይ ኢስታ
ካታማታ ኦላና፤
ኢስታ ካታማታ ፔንጌታካ
ሚንፔሬላ ዬጋና።
ኢስቲካ ሙሌራ ጳያና።

7 ታ ዴሬይ
ታፔ ሃካናስ ኮዪዴስ፤
ጌዲኮካ ኢስቲ ታኮ ኡባፌ
ዎልቃማ ጸሳኮ ዋሲኮ
ታ ኢስታ ኣሺኬ።

8 «ኤፍሬሜ! ታ ኔና
ዎስታ ኣጋጋኔ?
ኢስራኤሌ ታ ኔና
ዎስታ ኣላ ኢማኔ?
ታ ካሴ ኣዳማኒኔ
ጸቦይሚን ኦሊዳይሳሶ
ዎስታ ኔ ቦላ ኦሶ?
ታ ዎዚናይ ጌዶን ቃዲዴስ፤
ታ ማርቴላይ
ኔና ኣሻና ዳንዲዴስ።

9 ታኒ ኢንቴ ጌዶን ዲዛ ጌሻ
ጸሳ ኣቲን ኣስ ጌዲኬ።
ታ ሃንቆራ ኢንቴኮ ዪኬ፤
ታ ቦሻ ሃንቆ
ኢንቴ ቦላ ዬዲኬ፤
ኤፍሬሜ ዛራዳ ጳይሲኬ።

- 10 «ታኒ ጎዳይ ኢስታ አሻናሰ
 ጸጊዛ ጋሞ ማላ
 ታኒ ታ ቃላ ሲሲሺን
 ኢስቲ ታና ካላና፤
 ታ ናይቲ ኮኮሪሽ
 ኣርሼይ ሞኪዛ ባጋፌ ያና።
- 11 ጊብጾፔ ካፎ ማላ
 ኣሶሬፔ ሃራጼ ማላ
 ፒራጂ ያና።
 ታኒ ኢስታ ኢስታሶሆን
 ዋላና» ጌሰ።

ኢስራኤል ናጋራኔ የሁዳ ናጋራ

- 12 ጎዳይ፥ «ኤፍሬሜ ዋርዶን
 ኢስራኤልይካ ጌኔን
 ታና ጊደሉዴሰ፤
 የሁዳይ ጸሳሰ
 ሃራቶንታዴ፤
 ኣማኔቲዳ ጌሻዛራ
 ኤቄቲዛዴ» ጌሰ።

12

- 1 ኤፍሬሜይ ጫርኮ ሄንፋንቻ፤
 ጋላሰ ኩሜሐ ኣርሼይ ሞኪዛ
 ባጋ ጫርኮ ካሌሰ፤
 ዋርዶኔ ማካላ ዳሪሴሰ።
 ኣሶሬ ዴራራ
 ጫቆ ቃላ ጌሌሰ፤
 ዋጋራ ዛይቲ ጊብጾ ቢታ ዬዴሰ።
- 2 ጎዳይ የሁዳ ዴራ ቦላ
 ሺሺዛ ሞቶይ ዴሰ፤
 ኢዚ ያቆቤ ኢዛ
 ሃኖታ ማላ ቃጸያና።
 ኢዛ ኦሶ ማላ ኢዛሰ ኢማና።
- 3 ያቆቤይ ቡሮ
 ባ ኣዬይ ኡሎን ዲሺ
 ባ ኢሻ ቶሆ ቂርጼ ኦይኪዴሰ፤
 ኣሳ ዛዋ ጋኪዳፔ ጉዬ

- ጸሳራ ባጾቲዳሰ።
 4 ከታንቻራ ባጾቲዳ
 ኢዛ ጸኒዳሰ፤
 ኢዛ ሲንፋን ቱማ ዳማናሰ
 ዬኪ ዋሲዳሰ፤
 ኢዛካ ቤቴሌን ዳሚዳሰ፤
 ሄን ኢዛራ ሃሳዬቲዳሰ።
 5 ጎዳይ ኡባፌ ዋልቃማ ጸሳይ
 ኢዛሰ ኤሬቲዳ ሱንፋይ ጎዳ።
 6 ሄሳ ገሻሰ ኔ ጸሳኮ ሲማ፤
 ሲቆኔ ቱሙ ፒርዳ
 ሎኤፋ ኦይካ፤
 ኡባ ዋዴ
 ኔ ጸሳን ኣማኔታ።

 7 «ዛልኣንቻቲ
 ዋርዶ ጌዳራን ባይዜቴሰ፤
 ሾጮቹካ ደሴቴሰ።
 8 ኤፍሬማይ፥ ታኒ ዱሬ፤
 ታ ዱሬታዲሰ፤
 ታሰ ሃይሲ ኡባይ ዲሺን
 ኣይ ቆሆይካ
 ዋይኮ ናጋራይ
 ታ ቦላ ጋኬና
 ጌ ጩቄቴሰ።

 9 «ኢንቴና ጌብጾ ቢታፌ ኬሲዳ
 ጎዳ ኢንቴ ጸሳይ ታና፤
 ላይፋ ባኣሌ ጋላሰ
 ካሴ ኢንቴ ኦሒዛ ማላ
 ኢንቴ ኢንቴ ዱንካኔን ዳና ማላ
 ታ ኦፋና።

 10 «ታኒ ካሴታዳ ናቤታሰ ዮታዲሰ፤
 ዳሮ ኣጂታ ታ ኢሰታ ቤሳዲሰ፤
 ኢሰታ ባጋራ ሌሚሶን ዮታዲሰ።

11 ጋላኣዴን ኢታቴሊ ኩሚዴስ፤
 ኣሳይካ ሹፋሮ ጸላ።
 ጌልጌላን ሚርጎታ ያርሾስ
 ሺሺዞ?
 ኢስታ ያርሺዛሶይ ሜቄሬቲዲ
 ጎሻ ጊደን ኮሬቲዲ
 ሹቻ ማላ ጊዳና» ጌስ።

12 ያቆቤይ ሜስጴጾሚያ
 ባቃቲዴስ፤
 ኢስራኤሌይ ማቾ ኤካናስ
 ሄን ሃጋዚዴስ፤
 ኢዚስ ኢማና ጨሎሻ ጊሻስ
 ዶርስ ሄሚዴስ።

13 ጎዳይ ናቤ ባጋራ ኢስራኤሌ
 ጌብጾፔ ኬሲዴስ፤
 ናቤዛ ባጋራ ኢስታ
 ኢሻልሲ ኦይኪዴስ።

14 ጊዶ ኣቲን ኤፍሬሚይ
 ኢዛ ኬሂ ሃንቄሊዴስ፤
 ኢዛ ጎዳይ ኢዚ ሱል ጉሲዳ ማላ
 ቆሆዛ ኢዛ ቦላ ጋላና፤
 ኢዚ ለቂዛ ለቆዛ ጊሻስ
 ኢዛስ ቤሲዛዝ ቃንጸና።

13

ኢስራኤሌ ቦላ ያና ወርሴላ ፒርዳ።
 1 ኤፍሬሚይ ኢስራኤሌ ዴሬዛ ጊዶን
 ቦንቹቲ ዲዛ ጊሻስ
 ኢዚ ሃሳይሺን ኣሳይ
 ኡባይ ኮኮሬስ።
 ጊዶ ኣቲን ባኣሌስ
 ጎይኒዳ ጊሻስ
 ቆሂዴስ፤ ሃይቂዴስ።
 2 ሃኢካ ናጋራ ቦላ

ናጋራ ጉጂዳ፤
 ባንታ ጨንጨቴላን ሚሰሌታ
 ባሰ ገግሲዳ፤
 ቢራፔ ኤቃ ጸሳታ
 ባንታሰ ሜዲዳ፤
 ሄይቲ ወሪካ
 አሳ ኩሼን ኦሴቲዳይታ፤
 ሃይታ ሃ አሳታ ገሻሰ፤
 «አሰ ያርሾ ሂሰቲ ሺሼቴሰ፤
 ማራ ሚሰሌን ኦሴቲዳ ኤቃ
 ጸሳታ ዩሬቴሰ» ጌቴቲዳሰ።

3 ሄሳ ጋሶን ኢሰቲ ዋንታ
 ማላዶ ሻራ ማላ
 ጮ ቲሞኢ ጋና፤
 ማላዶ ጸዛ ማላካ ጮ
 ዋዲ ዳያና፤
 ዋይኮ ባንጋ ቡኪዛ ባሌፔ
 ጎቲ ጮርኮይ ኤፊዛ
 ሱላ ማላ ገዳና፤
 ዋይኮ ኬላፊ
 ኬዚዲ ቤቲሼ
 ጮ ዳይዛ ጨዋ ማላ ገዳና።

4 ጎዳይ፥ «ኔና ገብጾፔ ኬሲዳይ
 ታና ጎዳ ኔ ጸሳ፤
 ኔሰ ታፔ አቲን
 ሃራ ጸሲ ዳና፤
 ኔና አሺዳይ ታፔ አቲን
 ሃራ ጸሰ ገዳና።

5 ባዞ ቢታን ካሊኔ ሃሊ ባይንዳሶን
 ኔና አሻልሳ ዋላዲሰ።

6 ገዶ አቲን ታ ሚዚን
 ኢሰቲ ካሊዳ፤
 ካሊዲ ኦቶሬቲዳ፤
 ሄሳፊ ጉዬ ታና ባሊዳ።

7 ሄሳ ገሻሰ ታኒ ኢሰታ ቦላ
 ጋሞ ማላ ያና፤
 ማሄ ማላ ኦጌ ቦላ

ዛማዳ ኡታና።
 8 ኢዚ ማራቲ ቦንቄቲዳ ዛርዶ ማላ
 ታ ኢሰታ ሸጫናኔ
 ፑዜሬላና፤
 ታ ኢሰታ ጋሞ ማላ
 ፑዜሬላ ሚታና፤
 ዎራ ዶኣ ማላ ዲቤሬላና።

9 «ኢሰራኤል ዳሬዘ!
 ኔ ታ ቦላ ዳንዲዳ ጊሻሲኔ
 ኔና ማዲዛ ታናራ
 ኔ ኤቄቲዳ ጊሻሰ
 ኔ ጳያና፤

10 ኔ ታና፥ ሐታሰ ካዎኔ
 ሃላቃታ ኢማ፥ ጋዳሳ፤
 ሂሰቲን ሃኢ ኔና ኣሻና
 ካዎይ ኣዋን ዲዜ?
 ኔ ካታማታን ዲዛ
 ሃላቃቲ ኡባይ
 ሃኢ ኣዋን ዲዛ?

11 ታ ሃንቄታሼ
 ኢንቴሰ ካዎ ኢማዲሰ፤
 ጊዶ ኣቲን ታኒ ቦሻንካ
 ኢዛ ሻራዲሰ።

12 «ኤፍሬሜ ቆሆይ ዶሬቲዳሰ፤
 ኢዛ ናጋራይካ
 ማዝጋቤን ጸፊቲዳሰ።

13 ሚጻይ ኦይኪዳ ማጫሳ ማላ
 ኢዛ ቦላ ሜቶይ ያና፤
 ኢዚ ጊዲኮ
 ኣጼ ኤራቴላ ባይንዳ
 ኤያ ና፤
 ዬሌቲዛ ዎዴይ ጋከን
 ባ ኣዬይ ኡሎፔ ዬሌታናሰ
 ኮዮንታ ና ማላ።

14 ታኒ ኔና

ዲፎ ዋልቃፌ አሻና፤
 ሃይቆፔካ ዋዛና።
 ሃይቆ! ኔ ዋቋዛ
 ዋልቃይ አዋን ዲዜ?
 ዲፎዘ! ኔኒ አስ ቆይሲዛ ዋልቃይ
 አዋን ዲዜ?

- ታኒ ኢዛስ ቃጆቲኬ።
- 15 ኢዚ ባ አሻታ ጊደን
 ዲሬ ጊዲኮካ
 ጎዳፔ ከቲቲዳ ጫርኮይ
 ኣርሼይ ሞኪዛ ባጋራ
 ባዘ ቢታፌ ዴንዲዲ ያና።
 ፑልቶይ ቶኣና፤
 ሃላ ኦላይካ ሜላና፤
 ኢዛስ ዲዛ ኣልኦ አቆታይ
 ሚንጃ ኬላፌ ቦንቄታና።
- 16 ሳማሪያ አሳይ
 ባንታ ጸሳ ቦላ
 ማካሊዳ ጊሻስ
 ባንታ ቆሆ ቶካና፤
 ማሻንካ ሲፌታና፤
 ቄሪ ናይቲ ቢታ ቦላ
 ዲንጨታና፤
 ቃንላራ ዲዛ ማጫሳታ
 ኡሎይ ዳኬታና» ጌሰ።

14

- አሳይ ማሬታና ማላ አዋጃቲዳ አዋጃ
- 1 ኢሰራኤል ዳሬዘ!
 ኢንቲ ኢንቲ ናጋራ ጋሶን
 ኩንዲዳ ጊሻስ
 ጎዳ ኢንቲ ጸሳኮ ሲሚቲ።
- 2 ፓጾላ ቃላ ኤኪ
 ጎዳኮ ሲሚዲ፤
 «ኦ ናጋራ ኡባ አቶ ጋ፤
 ኦኒ ኦ ዶናፔ ጋላታ

ሺሻና ማላ
 ኔ ማርቴላን ኑና ኤካ።
 3 አሶሬይ ኑና አሼና፤
 ኑኒ አላ ፓራታንካ
 አማኔቶኮ፤
 ሃይሳፌ ጉዬ ኑኒ
 ኑ ኩሼን ሜዲዳ
 ኤቃ ጸሳታ፤
 «ሃይቲ ኑ ጸሳታ» ኅኮ።
 ማንቆቲ ኔፔ ቃዴቴላ
 ዴሜቴሰ» ጊቴ።

ኦራላ ዴኦስ ሂደታይ ኢሜቲዴስ
 4 ኅዳይ፥ «ታ ሃንቆይ
 ኢስታ ቦላፌ ሲሚዳ ጊሻስ
 ታስ አማኔቶንታ ኢጲዳ
 ታ ዴራ
 ታ ፓላና፤
 ታ ኢስታ ጮ ሜላ ሲቃና።
 5 ታኒ ኢስራኤሌ አሳስ
 ፑሴ ኢራ ማላ ጊዳና፤
 ኢስቲካ ሎኦ ጨሻ ማላ ጨያና፤
 ሊባኖሴ ዚጋ ማላ
 ጸጸ ዬዳና።
 6 ኢስታ ሃጋይ ዲጫና፤
 ዋጋራ ሚላ ማላ
 ኢስቲ ሎኦና፤ ሊባኖሴ ዚጋ ማላ
 ሎኦ ሳዋ ሳዋና።
 7 ኢስቲ ሲሚዳ
 ታ ኩዋ ጋርሳን ኡታና፤
 ጫሬቻ ካላ ማላ
 ኢስቲ ጨሊላና፤
 ዋይኔ ሚላ ማላ ኢስቲ ጨያና።
 ኢስታ ሱንላ ሊባኖሴ
 ዴሬ ዋይኔ
 ኡሻ ማላ ኡባሶን ኤሬታና።
 8 ኤፍሬሜ! ታሲኔ ኤቃ ጸሳታስ
 አይ ጋይቶቴላ ዲዜ?
 ኔ ዋሳ ሲዪዛይኔ

ነና ናጊዛይ ታና፤
 ታኒ ኡባ ዋዴ ጨሊሊ ኡቲዳ
 ሚላ ማላ፤
 ኔ አይፊዛይ
 ታፔ ዴንዲዳይሳና» ጌሰ።

ኩሻ ቃላ

⁹ አጵ ኤራንቻይ
 ሃ ዮኦታ አኩካና።
 አኬኪዛይ ሃ ዮኦታ ኤራና፤
 ጎዳ ኦጌይ ሱሬ፤
 ጸሎቲ ኢዛን ሄማቴቴሰ።
 ናጋራንቻቲ ጊዲኮ
 ኢዛን ቆጶቴቴሰ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b